

BERTSO BERRIAK

Imanol Lazkano

Gabonkeriei jarriak

DANI BLANCO



I

Gabon inguru hontan
inor ez da xurra
krisian gaudela ta
guzia gezurra!
Kontsumismoak egin
digu iruzurra:
patrikak hustu eta
gorputza izurra.

II

Lehen Erregeak ziren
orain Olentzero
denak batuta ere
azkenean zero
mezu berberarekin
baitatoz urtero:
Guztiok egitea
dendaren bezero.

III

Jaitsiko balitz Jesus
gurutziltzatua
lehenbizi salatuko
luke Aita Santua
ta gero kontsumismo
neurritz pasatua
esanaz “hori ez da
nik proposatua”.

IV

Jesusen historia
konta izan denez
mundu berri batean
egin zuen amets.
Izan nahi zuen hura
behartsuen babes
bihurtu da dirua
lortzeko lanabes.

V

Belengo estalpea,
Belengo arotza
gaur egun askorentzat
histori arrotza.
Gabon kanpaiak txin txin
diruaren hotsa
horrela ospatzen da
Belengo jaiotza.

VI

Iberdrola ere txintxo
Belenaren bila
piztu ditu milioika
farol ta bonbilla
ta orain eskertzeko
halako lan pila
tarifa igo eta
lasaitu dadila.

VII

Nahiz eta jakin zer den
saltzaileen asmua,
Olentzeroz mozorro
oi dute mamua.
Beti bezala irents
dugunez amua
alferrikakoa da
oraingo damua.

VIII

Nahiz askok ez sinistu
Belengo estanpan
urtero izar bera
pizten dute mapan.
Nola denok erori
ohi garenez tranpan
orain arnas estuka
urteko aldapan.

DOINUA: “Maritxu nora zoaz”.



Bidali zure sortak bertsoak@argia.com helbidera. Aukeratuak orri honetan argitaratuko ditugu.